

# 阿呆讀冊

◎紀傳州

老員外飼一個後生，真戇，人攏叫伊阿呆。老員外倩一個真有學問的老先生，專門來教伊，可惜阿呆真袂上教（tsiünn-kà）。

有一擺，阿呆卜出去 tshit-thô，老員外吩咐老先生陪伊，閣叫伊教阿呆按怎吟詩做對。第二工，師徒做伙出門。沿路山明水秀，景緻秀麗，雙人攏真歡喜。雄雄，一陣風吹來，菅芒葉予風吹甲 sā-sā叫，阿呆問先生這有啥麼學問，老先生慢慢仔唱講：「風捲菅葉萬萬片。」阿呆感覺誠有詩意，著共記稠咧。

雙人向前行，有一板橋，二人真細膩行過去。阿呆閣問老先生，這又閣有啥麼學問，老先生講：「雙木好走，獨木難行。」阿呆感覺這句嘛袂 bái，閣共暗唸起來。

行過橋，拄好看著一個村婦塊飼豬，一群豬仔圉圍仔豬的身軀邊。阿呆閣問講這是啥麼學問，老先生唱講：「一岫豬仔圉圍豬母咧玲瓏瓏（séh）。」哦！這句話真心適，阿呆緊共記仔心內。

行無幾步，看著一隻狗仔塊迕(jiok)兩隻兔仔，阿呆閣問講這有啥麼學問，老先生隨喙講：「一犬難追二兔。」阿呆感覺這句話閣卡趣味，又閣共記起來。

師徒兩個人那行那講，日頭漸漸卜落山矣，著歡歡喜喜倒轉去。老員外看著 in 圉轉來，對喙著問講：「阿呆！汝今旦日出去，有學著什麼學問無？」阿呆誠得意，應講：「孩兒在外一工，可比登天一年，沿路嚴師教示，增識不少。」老員外一下聽，感覺這個囡仔講話有卡膨風，毋過，心內嘛是暗暗仔歡喜。

隔轉工，老員外作生日，厝內人客來真濟，足鬧熱的。酒桌中，老員外想 in 圉昨昏出去 tshit-thô轉來，講加捌真濟，著叫伊仔眾人面頭前展一下仔學問咧！阿呆知影 in 老爸的意思，著當眾人的面頭前，hàinn 頭搖腦，唱講：「風捲菅葉萬萬片。」逐家一下聽，有影袂 bái，這個囡仔呵咾哩。伊身軀邊有一個人客，順勢舉予伊一雙箸，請阿呆 lim 酒用菜，阿呆共箸接過來，著講：「雙木好走，獨木難行。」逐家閣攏喝好。這個囡仔真正是詩詞滿腹，有學問哦！

這個時陣，員外娘歡頭喜面出來，逐家相爭共伊敬酒祝賀。阿呆隨喙唱講：「一岫豬仔圉圍豬母咧玲瓏瓏。」今(tann)！害矣！傷離經啦！有兩個人客袂堪得這款的糟蹋，氣掣掣，幹頭著走。老員外感覺真失禮，綴後面迕出去，阿呆看著，閣大聲唱講：「一犬難追二兔。」逐家笑甲厝殼蓋強卜夯(giâ)起來。